

# Dèlba l'arà na neva piazza

Via per l'aisciuda cognessa scomenzèr i lurieres per ge dèr al paisc de Dèlba na piazza. Vegnarà fat ence l festil descheche l'era n'outa



*I rendering de la piazza de Dèlba projetèda da l'architet Carlo Gandini.*

Urbanistica - Desche da program, l'amministrazion de Cianacei vidèda dal capocomun Silvano Parmesani la va inant con i projec de miorament ti paijes. I etres egn l'é stat dat neva parbuda a Piazz Marconi a Cianacei e ades se va inant ence coi etres ciantons del Comun. Un de chisc l'é la piazza de Dèlba che vegnarà fata fora con l'aisciuda.

La volontà de l'amministrazion de Parmesani l'é chela de ge dèr neva vita e valorisèr l paisc de Dèlba. "Prum de dut – l'ài dit l capocomun – volesse dir che per me l Comun de Cianacei l pèrt da fora Gries e l tol ite dut l

teritorie fin sun Sela, Pordoi e Fedaa. Per Dèlba é volù con forza chest projet percheche peisse che sie giust ge dèr a Dèlba chel che la se merita. La n'è de besegn e ence percheche se cogn calcolèr che Dèlba e Penia ensema les à i medemi posc let che Cianacei.

La piazza, per n paisc e sia comunanza l'é n pont de referiment emportant, l'é n pont de enconter e sun chest projet, desche per chel de Penia, dut l Consei de Comun l'é stat a una. Son stolz. Apede dapò voi spieghèr che l projet de la piazza de Dèlba l'é pèrt de n projet amò maor, che vel jir a valorisèr ence l setor

comerzièl de strèda de Costa e creèr n percors che lee dut l paisc, per ge dèr amò più valor ai investimenti che i à fat i impiantisé te chisc ùltime egn. Con la forenada Dolèda fin sun Col di Rosc e con la neva cabinovia de Ciampac ades ence Dèlba l'è maores benefizies a nivel turistich e desche amministrazion no podon che ge jir dò a dut chest con projec de sostegn per l paisc.

Per i finanziaments, l projet per la piazza de Dèlba l'é stat ametù tel Fondo Unico Strategich de Fascia e con l'ultima aproazion da pèrt del Comun general de Fascia che sarà via per de

firé se podarà pissèr a tachèr i lurieres."

L projet de la piazza de Dèlba l'é stat fat da l'architet Carlo Gandini e l tol ite duta l'area che va dal crousdevia con la Zapadoa (Str. de Sorapera) fin ite ló da la Coprativa. Vegnarà batù jù l mur de sasc che l'é ades e fat na area più torona de presciapech 1000 metres cadrac con fon de lèstes de porfir con dessegnes desvalives. Da na pèrt, sot l garnì Val de Costa per se entener, vegnarà fat sù na scèla che porta sun n picol barcon e che dapò la seghita ence sot

Strèda del Cuch fin te chel picol parch che l'é ló te sora.

Su per la Zapadoa vegn fat dotrei posc per i auti e amò ló vejìn vegn fat n festil con n teac. La jent più de età de Dèlba la sarà contenta ajache n'outa proprio aló l'era n gran festil olache la femenes jia ence a fèr lesciva (vèrda la fotografies).

Semper te la pèrt maora de la piazza, te la pèrt sot tera, troarà lèrga n deposit de Comun o ence, se ipotisea, ofizies del turism. Te la pèrt ite per Costa vegnarà fat posc per i auti en paralel a la strèda. (vr)